

Nasionalisme perlu dimiliki semua pihak — Mahathir

UM 4 SEP 1985

(P) KUALA LUMPUR 3 Sept. — Datuk Sri Dr. Mahathir menegaskan semangat nasionalisme adalah penting bagi bangsa dan negara kerana ia sahaja menjadi nilai yang perlu dimiliki oleh semua pihak demi mewujudkan perpaduan negara.

Perdana Menteri berkata "dari segi agama, walaupun kita berpegang kepada nasionalisme tetapi kita tidak berpandukan kepada nasionalisme yang ekstrim seperti yang terdapat di setengah-setengah negara Barat."

"Nasionalisme kita juga tidak mengatasi rasa persaudaraan terhadap orang-orang Islam yang lain serta tidak bercanggah dengan kehendak agama Islam."

"Kita harus ingat tanpa nasionalisme kita sendiri kita tidak dapat mempertahankan diri kita, kerana pi-

hak - pihak lain termasuk orang-orang Islam sendiri tidak akan mempertahankan kita."

Dalam temuramah dengan akhbar rasmi UMNO "Merdeka" keluaran terbaru bulan ini beliau menambah tanpa nasionalisme sesuatu bangsa akan berpecah belah dan bila ini berlaku maka dengan mudah sahaja dikongkong oleh orang lain.

Beliau menarik perhatian mempertahankan nasionalisme menjadi satu perkara yang penting untuk mengekalkan kedudukan dan perpaduan bangsa.

Menyentuh tentang apa yang akan diwarisi oleh generasi muda di masa hadapan. Datuk Sri Dr. Mahathir menegaskan yang utama ialah penghormatan oleh dunia terhadap negara dan bangsa supaya kita ti-

dak dipandang rendah atau dihina oleh sesiapa.

Untuk mencapai matlamat itu. Katanya, kita perlu membuktikan kepada dunia tentang keupayaan dan kebolehan bangsa kita. Ini bermakna kita mesti mempunyai nilai-nilai mulia yang mengamalkan kehidupan yang baik, cekap, bersih dan beramanah.

Hanya dengan cara itu sahajalah kita dapat membina sebuah negara yang maju, kukuh lagi kuat serta menjadi satu bangsa yang dipandang tinggi oleh seluruh dunia, tambahnya.

"Jadi kita jangan anggap warisan, cuma bermakna kita dapat harta, tetapi lebih penting daripada harta ialah kita mewarisi nilai-nilai mulia yang tetap akan menjayakan bangsa kita," kata Perdana Menteri.